

EPISTOLA

ANATOMICA, PROBLEMATICA

SEPTIMA.

Authore

JOHANNE HENRICO GRÆTZ,

Ad Virum Clarissimum

FREDERICUM RUYSCHIUM,

Med. Doct. Anatomiae ac Botanices Professore.

DE

Pia Matre, ejusque Processibus.



AMSTELÆDAMI,

Apud JOANNEM WOLTERS, 1696.

2413 A 2

THE NEW YORK PUBLIC LIBRARY

ASTEN LENOX TILDEN FOUNDATION


CHAMBERS STREET

NEW YORK

THE NEW YORK PUBLIC LIBRARY

ASTEN LENOX TILDEN FOUNDATION

CHAMBERS STREET



Celeberrime & Experientissime

Vir, Fautor æstumatissime.



Uæ Nominis Tui celeberrimi fama mihi adhuc in Germania degenti tuum in Anatomicis indefessum studium, atque inventorum præstantiam patefecerat, animum meum simul occupaverat totum, ut abhinc nihil magis in votis habuerim, quam ut ea mihi olim contingeret felicitas, ut assiduis, quos pro cognitione Anatomica amplianda suscipis, laboribus ipse adessem præsens. Huic vero votorum meorum summæ felicem jam respondere eventum, summo meo emolumento experior, eoque nomine lætor quam maxime. Ab eo enim tempore, quo hisce traditus terris exoptatissimam primo nactus fui occasionem me Tibi commendandi, adeo pronum statim tuum in me affectum deprehendi, ut citius me beneficiis innumeris à Te cumulatum, iisque tantum non obrutum sentirem, quam ple-

plenarium tuum favorem demereri (si unquam illi demerendo par sit virium mearum tenuitas) allaborassem. Quippe non solum nitidissimis tuis demonstrationibus me interesse voluisti, neque uberrimam mihi copiam, propriis viribus in cadaveribus humanis secandis aliquid moliendi, dedisse satis favoris & beneficii Tibi visum fuit, sed, qui est pronissimus tuus studiis meis inserviendi animus, patentissimum mihi ad ædes tuas & Museum Anatomicum concessisti aditum.

Atque in hoc quidem admissus, quoties oculorum aciem figo vel in sceletorum eburneam albedinem; vel intueor accuratius cadaverum, felicissimo Balsamationis invento corruptioni exemptorum, vivacissimum colorem & obsequiosam flexilitatem; vel dum considero vasa cujusvis visceris sanguinea ad minutissimos usque & microscopiis tantum obvios ramos singulari artificio repleta & extricata; vel adspicio corda humana, vasorum suorum coronariorum reptatu in apricum posito superbientia, & Aortæ diramificationis viva imagine Authoribus nonnullis errorem, quem in ea delineanda commiserunt, enormem exprobrantia; vel, verbo denique, contemplor totum Microcosmum, quoad singula sua membra stupenda certe arte & immenso labore explicatum, toties lynceos mihi oculos, illis naturæ arcanis lustrandis solum sufficientes, denegatos esse summopere dolco. Spirant hæc omnia encheirises prorsus singulares & tantum non omnes Anatomicorum artes antecellentes, spectatoremque ingenuum in summam rapiunt admirationem, ringente licet malevolorum turba, quæ, cum hæc captu suo & artibus non assequatur, theonino rodit dente, vanidaque iræ & invidiæ tela in ea jaculatur.

Non fane cuncta hæc dignis prosequi encomiis in me suscipiam, opus enim molirer, cui ferendo humeros meos omnino impares agnosco, eoque magis laudibus illis supersedeo, cum inter raras animi tui dotes non ultimum locum modestiam occupare, illamque hisce facile offendi probe sciam. Quin potius mea inscribendo iterata audacia excusanda mihi venit. Veniam
itaque

itaque des, quæso, flagranti meo sciendi desiderio & justæ curiositati, qua tua ad primas meas litteras responsione, humanitatis, favoris & eruditionis plena nondum in totum contentus, tuos rursus interpellare labores, tuamque clariorem informationem efflagitare ausus sum.

Cum enim nuper inter rariora tua præparata oculis meis subjiceres *Piam meningem*, quam tua solertia adeo accurate & circumspecte ex omnibus Cerebri & Cerebelli plicis & anfractibus protraxerat & separaverat, ut curioso prorsus spectaculo rugositates ejus superficiei interioris apparerent, miratus sum Authorum in illis investigandis incuriam. *Galenum*, *Vesalium*, *Riolanum*, *Veslingium*, *Bartholinum*, *Diemerbroekium*, *Willisium*, *Vieussens*, uno verbo omnes tam recentiores quam veteres si evolvat quis, altum omnino apud illos reperiet silentium de vero insinuationis piæ matris in substantiam cerebri modo & facie. Neque in ipsis Tabulis Anatomicis *D. Bidloei*, ex quibus tamen frustra multa sibi hætenus promiserunt plurimi, aliquid, quod ab aliis inculcatum sæpius non fuerit, deprehendi, sicco enim plane pede præterit ipse Anthor ea, quæ alii circa hanc materiam tacent, quæque Tua demum, Vir Celeberrime, nobis ostendit industria. Cujus quidem omnimodi omnium Authorum silentii rationem suppeditat ipsa illa Hujus Meningis, secundum *Willisium*, *Vieussens*, ipsamque Autopsiam, profunda in cunctos cerebri & cerebelli anfractus insinuatio atque immersio, ex quibus illam extrahere hætenus omnibus difficile, si non impossibile, *Willisio* vero *Anatom. Cerebri Cap. VII.* in cerebro bruti hominisque hydrope defuncti tantum opus possibile visum fuit.

Maxime igitur tuæ consules famæ, Vir Celeberrime, & eruditorum satisfacies curiositati, si veram illam piæ Meningis tam cerebri quam cerebelli interstitia intransientis superficiem internam ejusque faciem & constitutionem depictam & explicatam exhibeas.

Servet interim Te, Maximum rei Anatomicæ Ornamentum,

tum, Divinum Numen cum Dilectissimo & unico Filio, Virtutum Paternarum strenuo æmulo & laborum tuorum socio assiduo, fospitem & incolumem ad feros usque annos, quo Vestris auspiciis abscondita Microcosmi mysteria patefiant. Ita animitus foveat

Celeberrimi Tui Nominis

Dab. è Museo Amstel. die
6 Septemb. A. 1696.

Cultor perpetuus, Observantissimus

JOHANNES HENRICUS GRÆTZ.

FREDERICI RUYSCHII
RESPONSIO,

Ad Virum Expertissimum

D. JOHANNEM HENRICUM GRÆTZ.

*In Epistolam ejus Anatomicam, Problematicam,
de pia matre, ejusque processibus.*

FREDERIC RUSSELL
KESTON

JOHN H. BARNES

JOHN H. BARNES
JOHN H. BARNES

Experientissime Vir,

Ræter animum studiis meis addictissimum, tuam pariter in exarandis litteris promptitudinem singularem, ex Epistola vi. Septembr. mihi tradita intellexi. Vix enim mea ad primam tuam Responsio orbi erudito exposita fuit, quin mox denuo nova me & multo graviore petitione ad alia officia præstanda sollicitare volueris. Fateor equidem ultimum tuum desiderium adeo æquum esse atque humanum, ut morem ipsi gerere, petitisque tuis obtemperare omnino cogar, idque eo magis, cum non solum ad hoc officiorum genus sed & plura alia reddenda candor tuus & studium me obligent. Vereor autem, Experientissime Vir, ne, hoc cerebri & cerebelli tegmine à me exhibitum, cerebrum ipsum curiositas tua sit arreptura, cum circa illud plurima à me videris demonstrata, prorsus diversa ab iis, quæ ab aliis haud infimi subsellii Authoribus tradita sunt. Hæc autem Tuæ humanitati reliquenda sunt, cui satis superque constat de multifariis meis occupationibus & indefesso eruditis inserviendi studio.

Cerebrum à Cerebello quoad superficiei externæ figuram multum differre, nemo ignorat, qui vel Anatomiam è limine tantum salutavit: Cerebrum enim stricte dictum variis circumvolutionibus complicatur, quibus intestina mesenterio colligata, aut lactes Piscis Aselli majoris æmulari verè dixeris. Cerebelli vero substantiam parte exteriori tanquam è lamellis sibi invicem appositis & adsitis constitutam esse, ab aliis jamdum ad nauseam usque inculcatum est. Tenuem meningem inter cerebri & cerebelli interstitia sese insinuare, Te quidem recte mone, tritum quoque est, modus vero, quo hoc fieri crediderunt & scripserunt hætenus Authores, autopsiæ nullatenus congruus est.

Non enim existimandum, tali hoc fieri ritu, quali omentum

B

inter

inter circumvolutiones intestinorum demergitur, aut linteum, quod varios in sinulos intruditur à nobis. Quippe illorum sic sane imminuitur longitudo & latitudo, quod tamen nullatenus in pia meninge obtinere, accuratius attendenti manifeste apparebit. Clarissime hoc patet ex eo, quod post separationem caute à cerebro & cerebello factam illius magnitudo & extensio non augeatur, quantumvis in anfractus se insinuaverit, nisi ab undiquaque parte nexus illi fibrarum & vasorum ope facti suspensa manu tollantur.

Videtur itaque mihi dicta *Pia Meninx* in omnes sulcos & anfractus processus quosdam demittere, similem fere in modum, ac è duræ matris duplicatura processus falciformis, sinui longitudinali subjectus emergit, ita ut tot *Pia Mater* producat processus, quot reperiantur anfractus, eosque figura non quidem falciformes, sed serpentino ductu repentes, quemadmodum repræsentat Tab. 8. Fig. 4.

In Cerebelli interstitia verò pari modo immergitur *Pia Meninx*, tot processibus falciformibus, quot extant sulci seu anfractus, ablataque illa & separata jucundo omnino spectaculo exhibet Capitis papaveris albi loculamenta, ut videre est, Tab. 8. Fig. 1. & 2.

Plura ut hæc vice addam, substrata materia, temporisque penuria haud permittunt. Valere interim Te, vir Experientissime, ex animo precor:

Tuus omni studio & affectu

Amstelod: Ao. 1696.

d. 28 Septemb.

FREDERICUS RUYSCHIUS.



Fig. 1.



Fig. 2.




Fig. 3.




Fig. 4.



TABULA OCTAVA.

QUatuor comprehendit Figuras, quarum **P R I M A** Piam Matrem, (A) Cerebellum amicientem repræsentat, idque è corpore juvenili; in ea tot nobis occurrunt processus falciformes (C) quot reperiuntur anfractus in cerebello. Tota hæc membrana à Cerebello separata liquori innatabat cum delinearetur; quod ideò factum, ut processuum numerus eò distinctius oculos incurreret: considerandum ulterius hosce processus ab alluente liquore, cui innatabant, figuram falciformem non retinuisse, quod ideò figura **S E C U N D A** indigitat. Vasa Arteriosa adeò numerosa per hanc membranam sunt dispersa, ut, si omnia hic repræsentassem, processus falciformes prorsus oblitterassem, ea propter ramulos duntaxat aliquot (B) à latere adjeci. **D** Indigitat brevissimas tenuissimas & numerosissimas arteriolas è piæ matris facie interiore prodeuntes & speciem musci referentes, quod à nullo Anatomico hæctenus observatum.

F I G. S E C U N D A.

Unum ex processibus falciformibus piæ matris, cerebellum investientis demonstrat, in eo quoque vasculorum reptatus considerabilis ostenditur.

F I G. T E R T I A.

Piæ Matris cerebrum investientis portionem cum suis Arteriolis exhibet, ubi notandum, processus piæ matris, cerebrum investientis, haud obtinere figuram falciformem, prout in cerebelli pia matre, verum enimverò serpentino modo repentem; à nexibus autem fibrosis & vasculosis dissoluta est hæc piæ matris portio, & in planum expansa, ut vasorum reptatus exactissime pateret. Postremò quoque observandum in hac tertia figura, portionem piæ matris repræsentante, membranositatem minus à sculptore esse expressam, id quod studio factum, ne arteriolarum oblitterarentur.

FIG. QUARTA.

Portionem piæ Matris (A) cerebrum investientis, cum processibus suis (B. B) inter circumvolutiones cerebri sese insinuantibus, & serpentino ductu repentibus, demonstrat. Per hanc innumeræ Arteriæ (C) visuntur dispersæ, sunt autem multis numeris plures in subjecto ipso.





